

TEZAUUR LITURGIC

1 APRILIE

SLUJBA SF. CUVIOS VARSANUFIE PLIHARENKO DE LA OPTINA



**MINEIUL PE APRILIE
MOSCOVA**



Месяца апреля в 1-й день

Преподобного Варсонофия

Оптинского

На малой вечерни

На Господи, воззвах: стихиры преподобному, глас 2.

Подобен: Егда от Древа:

Егда найде на тя Божественное рачение,/ преподобне отче Варсонофие,/ и глас великаго аввы на высокая тя повлече,/ тогда оставил еси воинство царя земнаго,/ ополчение же монашеское тя, воина крепкаго, прият,/ и поборствуя мрачная бесовская полчища,/ не отступил еси пред врагом древним,/ темже и украсился еси венцем нетленным,/ стратилате Оптинский.

В божественное ополчение/ достойно вчинился еси, отче славный,/ не яко наемник, но яко поборник непобедимый,/ иноков воинство влечеши до ныне к высотам победным,/ мглу разгоняя греховную,/ долу влекущая страсти попаляя молитвы огнем./ Воеводо

избранный Царя Христа, Варсонофие,/ моли Господа
Сил непрестанно,/ о воспевающих память твою.

Яко солнце, возсиял еси в пустыни Оптинстей,/
молитвенными стоянии прогоняя полчища
демонская,/ лучами разсуждения рассеявая прелесть
врага,/ непобедимъ явился еси о Имени Господни,/ и
ангелов привлекл еси соратовати иноком,/
Варсонофие, игумене добрый./ Темже Господа Сил
моли о нас,/ да соблюдется обитель сия,/ яко веры
светильник.

Слава, глас 5:

Благодати старчества наследниче,/ преподобне
Варсонофие, отче наш, Амвросиево благословение,/
Анатолиево воспитание,/ Иосифов сотрудниче,/
Нектариев сотаинниче,/ Никону наставниче
любомудрый,/ преподобных отец соревнителю,/
Христа друже искренний,/ Того моли даровати
чтущим тя велию милость.

И ныне, Богородичен.

На стиховне стихирь преподобному, глас 8:

Показал еси рачение ангельское,/ и любовь истинную явил еси Владыце,/ в послушании и пощении, в словеси и молитве,/ равен быв по всему отцем твоим,/ и чудес лучами просиял еси:/ темже стратилат непобедимый,/ отче наш Варсонофие,/ предстательствуй за обитель и люди,/ чтущия память твою.

Стих: Честна пред Господем/ смерть преподобных Его.

Ревнуя поревновал еси,/ отче богомудре Варсонофие,/ отеческим преданием,/ и уставом спасительным,/ не яко трость, колеблема ветром века сего,/ но щитом вооружився послушания,/ верно последуя твоим наставником,/ молитвою возметал еси, яко прах,/ ополчения бесовская,/ и во обителях отцев твоих ныне водворяяся,/ не забуди обитель твою,/ тя величающую.

Стих: Блажен муж, бояйся Господа,/ в заповедех Его восхощет зело.

Питаемь от корней благих,/ возраставый под
сению отцев мудрых,/ явил еси старчества плод
совершенный, отче дивный Варсонофие,/ и Никона
славнаго, добропобедную леторасль,/ напоследок лет
нам даровал еси,/ с нимже ныне в раи водворяяся,/
назирай обитель твою, приснопамятне,/ возвращая ея
монашеския крины,/ одождением молитв твоих.

Слава, глас 6:

Воинскую славу мирскую оставив,/ и вся яже
тленная на земли,/ к горнему ратоборству востекл
еси,/ силою Христовою свыше одеян,/ и умною
молитвою вооруженный,/ неодолимь явился еси,
Варсонофие,/ побеждая духов во брани невидимей,/
и почести вышняго звания достигл еси./ Ныне же с
вышними соединивыйся воинствы,/ охраняй
отеческим благословением чад твоих,/ во еже
спастися душам нашим.

И ныне, Богородичен,
Тропарь зри на велицей вечерни.

На велицей вечерни

На Господи, воззвах: преподобному стихиры, глас 4.

Подобен: Званный свыше:

Свыше зван быв,/ а не от человек,/ егда болезнь
неисцельная/ связа телесныя уды,/ неплодныя
смоковницы посечение в разум приводя,/ тогда
небесный свет облиста/ мысленней очи,/ духовное
зрение отверзая./ Темже воин быв царя земнаго,
Варсонофие,/ служитель Христа, Света Истиннаго,
соделался еси,/ Егоже моли спасти и просветити
души наша.

Егда в пустыню Оптину,/ яко во град ограждения,
вшел еси,/ тогда седины твоя и разум/ в послушание
отцем преклонив,/ оружием смирения на исконнаго
врага ополчился еси,/ терпением скорбей искусство
стяжав,/ искусством же упование,/ о немже не
посрамился еси, преподобне,/ познав любовь Божию
Духом Святым.

Избранный свыше от младенства твоего,/ во еже
от ада исхищати души человек,/ сокровище духовное
от отеческого предания собрав,/ небесным хлебом

препитал еси приходящих к тебе,/ покаянием очищая
и ко Христу приводя,/ Егоже моли спасти и
просветити души наша.

Преподобным отцем последуя,/ разсуждения
превышший дар/ пользы ради людей приял еси,/
преподобне отче Варсонофие,/ духовне востязуя вся,/
от плотских никакоже востязуешися,/ ум бо имаши
Христов,/ темже моли спасти и просветити души
наша.

Свыше званнаго наставника иноком,/ земли
Русския печальника/ и всем христианом
молитвенника,/ ублажаем тя, Варсонофие отче наш,/
аще бо и пророческий твой язык умолче,/ обаче
веруем, яко любы твоя николиже престаает,/ и ныне
молиши Христа Бога/ спасти и просветити души
наша.

Слава, глас 6:

Огнем Божественнаго Духа/ разжжен быв,
преподобне,/ древнее житие монашеское восприял
еси,/ поборниче уставов иноческих/ и отцев твоих
наследниче,/ пустынь Оптинскую яко благоцветущий

рай показав,/ друже Предтечев и пустынных
обучителю,/ Варсонофие, отче священнейший,/ моли
избавитися будущих треволнений,/ верно
совершающым память твою.

И ныне, Богородичен: Кто Тебе не ублажит,

Пресвятая Дево:

Вход. Прокимен дне. И чтения преподобническая.

Аще ли пост, по входе прокимен Триоди, чтения
дне и преподобнаго.

На литии стихира храма.

И преподобному стихире, глас 6:

Любовию последуя во Иерусалим восходу,/ душу
предал еси Распеншемуся за тя,/ и венцем поругания
увенчался еси,/ и люте уязвился еси копием скорбей,
преподобне Варсонофие,/ темже зовем ти:/
благословен еси, отче,/ грядый прияти почестъ
вышняго звания,/ и Престолу Царя предстати,/
идеже помяни тебе последующих,/ и будущего
осуждения избави/ любовию хвалящих тя.

Слава, глас 3:

Велия молитв твоих сила,/ преподобне старче Варсонофие,/ духи бо лукавья отгоняеши,/ и вражия коварства разрушаеши,/ покаянием души исцеляеши,/ скорби и болезни утояеши,/ да вси прославим Христа Бога,/ Дивнаго во святых Своих.

И ныне, Богородичен, глас тойже:

Велия чудес Твоих, Благодатная!/ Избавляеши бо от бед и спасаеши от смерти,/ и восхищаеши от напастей нечаянных,/ и скорби разрешаеши,/ и согрешения человеков отъемлещи.

Аще пост, на стиховне стихире Триоди. Слава, преподобнаго, глас 8: Что ты, отче Варсонофие, наречем: И ныне, Богородичен воскресен, глас тойже.

На стиховне стихире преподобнаго, глас 1:

Преподобне отче Варсонофие, кто изочтет подвиги и труды твоя?/ Бдение же и пощение,/ в молитве терпеливое пребывание,/ церкви украшение и келлий строение,/ о иночестем чине и о всякой души попечение:/ уста бо твоя ко утешению отверзошася,/ сердце же распространися любовию,/ и не тесно

вместил еси приходящих к тебе,/ да вся
приобрящеши и Христу приведеш,/ Егоже моли о
душах наших.

Стих: Честна пред Господем/ смерть преподобных Его.

Яже в горний Иерусалим восхождения/ степени
прошел еси, Варсонофие отче наш:/ укорение,
клевету и поругание,/ возлюбленного скита
разлучение,/ крест настоятельства в старости и
болезни,/ обаче послушлив быв даже до смерти,/ во
Христе Иисусе мудрование стяжал еси./ Моли
спастися душам нашим.

Стих: Что воздам Господеви о всех,/ яже воздаде ми.

Яже в мире красная, преподобный остави,/ горния
красоты возжелев,/ и от гласа мирскаго слух
отвратив,/ пению небесному поучашеся,/ сердцем и
усты непрестанно пояше:/ Господи, Иисусе Христе,
помилуй мя грешнаго.

Слава, глас 8:

Что ты, отче Варсонофие, наречем?/ Провидца ли,
яко тайная душ обличаеши?/ Врача ли, яко недужныя
и бесныя целиши?/ Пророка ли, грядущая бо яве

скажуеши?/ Вожда ли духовна, спасения бо путь
указуеши?/ Многая от Бога приял еси/ и преумножил
еси дарования:/ моли спастися душам нашим.

И ныне, Богородичен воскресен, глас тойже:

Тропарь (Василия иеромонаха), глас 4:

Воине доблественный и изрядный,/ светом
откровения, яко Павел озаренный,/ вся во уметы,
Христа ради, вменил еси,/ иноческим подвигом
подвизался еси,/ течение скончав и веру соблюд,/
темже зовем ти:/ спасай нас молитвами твоими,/
преподобне Варсонофие, отче наш.

Ин тропарь, глас 3:

Красото Церкви Русския,/ утверждение старчества
Оптинскаго,/ иноческих заветов блюстителю,/
оруженосче Господень верный,/ преподобне отче
Варсонофие,/ мечем молитвы змия победивый,/
вышняя почести о Христе достигл еси,/ темже молися
Тому:/ отечеству на враги победу даровати/ и спасти
души наша.

На утрени

По 1-м стихословии седален преподобному, глас 2:

Книгу жизни, в нейже промыслом Божиим
письмена устроятся, уразумевати поучал еси чада
твоя, Варсонофие отче наш, духовне бо испытуеши
вся бываемая, от суетнаго сего к вечному животу
возводя человеки: молися убо, отче, о нас, да
благодатию Божію просветимся.

Слава, и ныне праздника, или Богородичен:

Милосердия сущи источник, милости сподоби нас,
Богородице, призри на люди согрешившия, яви яко
присно силу Твою: на Тя бо уповающе, радуйся
вопием Ти, якоже иногда Гавриил, Безплотных
архистратиг.

По 2-м стихословии седален преподобному, глас 6:

Возвеселил мя еси, Господи, в творении Твоем,
такое зывал еси, преподобне, дольния красоты
благое, яко сень и образ небеснаго зря и от
художества внешняго ко внутреннему обращая, сего
ради любовию ти зываем: радуйся, благодати

псалтирю dobroгласный, преподобне Варсонофие,
отче наш.

Слава, и ныне, Богородичен:

Краснейшаго добротою паче сынов человеческих,
во объятиих Своих несказанно носившая, Того
красоты взыскати привлецы мою душу, Тому во клети
сердца всегда собеседовати, да Тебе благодарно песнь
воспою: радуйся Мати Света благословенная.

По полиелеи седален, глас 6:

Днесь радуются собори верных, в молебней памяти
преподобнаго Варсонофия, старца Оптинскаго, иже
тесным путем в мире шествова, тяготы ближняго
трудолюбно нося и, на конец жития своего скорби и
разлучение от обители претерпев, мощьми своими ко
братии своей возвратися, и ныне, душою на небеси со
ангелы радуяся, молит прилежно о нас, любовью
совершающих светлое его торжество.

Слава, и ныне, Богородичен:

Безпомощным крепость Ты воистину, Пресвятая
Дево Мати, отсюда, смиреннии, Тобою возвышаемся

и к Тебе присно прибегаем: всем Ты еси Покров и к Богу Ходатаица.

Степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Всякое дыхание: Евангелие от Матфея, зачало 43.

По 50-м псалме стихира, глас 6:

Столпе огненный благочестия,/ предводяи иноческия полки,/ жезлом молитвы сланое море страстей разсек,/ в землю безстрастия обетованого достигл еси,/ демонская искушения посекая смиренномудрия мечем,/ соблюдая скит возлюбленный яко рай,/ и ныне гониши от стада твоего полки чуждих,/ Варсонофие, старче Оптинский,/ моли о душах наших.

Канона святого два.

Канон преподобного, глас 4, егоже краегранесие: Стратилата Оптинского венцем увязем.

Песнь 1

Ирмос: *Тристаты крепкия,/ Рождейся от Девы,/ безстрастия во глубине,/ души тричастное потопи,*

*молюся,/ да Тебе яко в тимпане,/ во умерщвлении
телесе/ победное воспою пение.*

Смиреномудрия венцем да украсится воин
Христов, приснославный Варсонофий, Божественным
смирением уязвивый прегордых бесов, и мрачная
собрания их разгнавый бичем молитвенным: тому
победное ныне воспоим пение.

Тристаты крепкия страстей, отче доблемудре
Варсонофие, потопил еси водами слезными, и
разжженныя стрелы врага угасил еси, во
умерщвлении телесе своего противляся сопротивнаго
приражениям.

Радостно во след Царя Христа потек, ангельскому
воинству поревновал еси, и доспехи воина земнаго,
яко вся мирская, с себе совлек, и в безстрастие
восхотев облещися, Варсонофие, иноческому полку
сочетался еси.

Богородичен: Ангельское воинство Тебе служит, и
Херувим и Серафим Тя славят множества, чистоте
Твоей дивятся Престоли, Силы же и Власти

проповедуют Твою державу, Владычице, яко родила еси всех Владыку и Спаса.

Ин канон преподобнаго, глас 2, егоже краегранесие: Оптинскую хвалу, Варсонофия ублажаем.

Песнь 1

Ирмос: *Моисейскую песнь восприимши, возопий, душе:/ Помощник и Покровитель бысть мне во спасение,/ Сей мой Бог, и прославлю Его.*

Оптины пустыни красу и хваление, преподобнаго старца Варсонофия ныне блажаще, Дивнаго во святых Своих Бога прославим.

Тишину скита возлюбив, преподобне, ангелу пустыни Предтечи последуя, устен безмолвием и молением непрестанным, помыслов откровением и вседушным послушанием, утешения благодатнаго был еси чадо, Подателя всяческих благ прославляя.

Богородичен: Иноком Тя помощницу теплую ведый, пред иконою Казанскою прилежно моляся, угодник Твой Варсонофий милость улучи, темже Тя в радости, Чистая Дево, прослави.

Песнь 3

Ирмос: *Утвердися сердце мое в Господе,/ дающем молитву молящемуся,/ яко лук сильных изнеможе,/ и немощствующии препоясашася силою.*

Треволнения мира избег, скит Оптинский избрал еси, Варсонофие, яко пристань безмолвную, старцем Амвросием призванный, и старцу Анатолию быв чадо послушания, темже и утвердися сердце твое во Господе.

Исполины страстей и бесов полцы изнемогоша, молитвою бо препоясався и именем Господним вооружився, тех поборал еси, Варсонофие воине доблий, Господа на помощь призывая.

Лукавствие врага изобличил еси, святоотеческий имея светильник разсуждения, в сердце же мир Христов: темже вся стрелы лукаваго невредны тебе сотворишася, богомудре, и лук того сокрушися.

Богородичен: Аще и во гресех есмь, и уста имам скверная, но не премолчу, Пречистая, благодеяния Твоя безмерная пети, Тобою бо утверждается сердце мое во Господе.

ИН.

Ирмос: *Неплодствовавший мой ум,/ плодоносен,
Боже, покажи ми,/ Делателю добрых, Насадителю
благих,/ благоутробием Твоим.*

Неплодные смоковницы посещения убоаяся,
преподобне Варсонофие, отче наш, данный ти талант
трудолюбно возделал еси: дивно бо бяше зрети мужа в
летех совершенна, яко отроча послушливо, старцем
внимающа, скорби от неразумных братьий терпяща,
благоутробнаго Бога о всем прославляюща.

Старца Анатолия глаголом внимая, не ризами
токмо черными, бдением и посты хвалитися, но
истиннаго монашества взыскати потщался еси, еже
есть сокровенный сердца человек, Животворящим
Духом внутрь созидаемый.

Книжное назидание с деланием сочетавати, от
старца Нектария, преподобне, навыкл еси, служа
тому, в затворе пребывающу, и безмолвно внимати
себе поучался еси.

Богородичен: Утоление страстей, молитвы
Подательнице, неплодие ума моего разреши,
Всещедрого Бога благоутробная Мати.

Ин кондак, глас 4.

Божественный ратоборец показался еси,/ отче
наш Варсонофие,/ крестом низлагая силу вражию,/ и
силою Богоданною чудеса сотворяя,/ темже Оптина
пустынь венчася славою твоих духовных побед,/
полководче монашествующих преславный:/ и ныне
молися Царю Христу,/ победы над страстями
даровати,/ верою и любовью совершающим память
твою.

Ин икос:

О воине доблей! О старче преподобнейший! Твою
доброту монашескую пети дерзнух устнама
нечистыма и умом слепотствующим, но послы ми в
помощь светлую лучу молитвы твоея, да тою
просвещаемь, тебе зову: Радуйся, монашествующих
полководче непобедимый; радуйся, победы
венценосче нарочитый. Радуйся, демоны в лица
уязвивый; радуйся, смирением своим ангелы

удививый. Радуйся, Оптинскаго старчества крепкое забрало; радуйся, молитвы умныя предивное светило. Радуйся, страждущим людем утешителю; радуйся, гражданине Царствия Небеснаго. Радуйся, предстояй Престолу Царя Христа, Егоже моли, победы над страстьми даровати, верою и любовью совершающим память твою.

Седален, глас 5:

Зарею бдений твоих просветил еси нощи, якоже дни, и свято совершив житие твое, со святыми ныне живещи, освящение посылая тя блажащим, преподобне отче Варсонофие.

Слава, и ныне, Богородичен:

Дево Пречистая, Покров буди на Тя уповающим, от различных напастей, обстояний и бед лютых свободяющи и молящи Сына Твоего спастися душам нашим.

Песнь 4

Ирмос: *Вознесена Тя видевши Церковь на кресте,/ Солнце Праведное,/ ста в чине своем,/ достойно зывающи:/ слава силе Твоей, Господи.*

Терпением, яко скала, пребыл еси, юже буря не поколеба бесовская, утвердив бо себе самаго на камени веры, выну ко Христу зывал еси, отче Варсонофие: слава силе Твоей, Господи.

Анатолия старца учениче, преподобне Варсонофие, Оптинских отец благодатный преемниче, искус сугуб прошед и в меру тех достиг, старцем по духу наследовал еси, зывая: слава силе Твоей, Господи.

Оптина пустынь и скит, и вся чада твоя, тя видевшие, яко сораспялся еси Христу, послушание понесый до смерти, да соделаешися совершен пред кончиною, вкупе зываху с тобою, преподобне: слава силе Твоей, Господи.

Богородичен: Пречистая и всекрасная Дево Марие, Солнце Праведное нам возсиявшая, Иже свет подает и радость миру, достойно Тя славим, Богорадованная.

Ин.

Ирмос: Пою Тя, слухом бо, Господи,/ услышах и ужасохся,/ до мене бо идеши, мене ища заблудшаго./ Тем многое Твое снизхождение, еже на мя,/ прославляю, Многомилостиве.

Юношески в старости твоей подвизаяся, послушание от Церкви, яко от руки Господни, приял еси: на брань в восточныя страны посылаешися, яко пастырь и утешитель воином русским.

Христова тя служителя зряще во врачевнице сущии воины: ови ранами тяжко уязвлени, ови же смерти приближающесе, души своя исповеданием очищаху и Святыя Тайны от руки твоея приимаху, во оставление грехов и в напутие жизни вечныя.

Воина Христова, Варсонофие, добропобедна, послушанием молитвы мечь изошривша, рождшая тя обитель паки прият, яко начальника иноком, и во бранех духовных вожда преизящна.

Богородичен: Ангельски воспеваю Ти: Благодатная, радуйся, радости вся исполнившая Твоим Рождеством, Божия снисхождения Лествице, и человеком степень восхождения.

Песнь 5

Ирмос: *Ревность примет люди ненаказанныя,/ законопреступныя евреи,/ и огонь пояст супостаты Твоя,/ яко Тя распятаго,/ лестца именоваша.*

Твоим добродетелем дивишася ангели, людие же ненаказаннии ты льстивым именовашу, обаче ты, преподобне Варсонофие, не люди, но грехи ненавидевый, токмо любити и добро творити призывал еси.

Истинный послушник быв, Варсонофие, и пастырь доблий явился еси, молитвы подвиг от старца твоего унаследовал еси, да люди Божия воистину наставиши, и от огня заступиши, льстивым врагом разжженнаго.

Назнаменуй нас крестом честным, той бо, яко жезл, восприял еси на поприщи земнем, Христа и древних преподобных в молитвах призывая, и не посрамлен был еси, имже и поприще твое духовное освятися.

Богородичен: Священную память воина Твоего, иноческое ополчение ко брани подвизает, Владычице: темже, радуйся, Взбранная Воеводо наша, Тебе зовем, Дево Марие, Богоблаженная.

Ин.

Ирмос: *Света Подателю, и веков Творче, Господи,/ во свете Твоих повелений настави нас:/ разве бо Тебе иного Бога не знаем.*

Лепоты храма Божия усердный рачителю, книгоположницы, келлий и вертограда скитского попечителю, паче же души братий хранити потщался еси, любовью, разсуждением и молитвою сети вражия расторгая премудро.

Унынием одержими, помыслы тяжко стужаеми, притекаху к тебе иноцы, яко авве своему, ты же коегождо яко чадо возлюбленно приимаше, оваго убо тихостию утешаше, оваго же прещением вразумляше, ко свету наставляя повелений Господних.

Верую к тебе прибегающим от мира, исцеления многообразная подавал еси, отче, страсти греховныя исторгая, и светом Христовым к правым стезям наставляя.

Богородичен: *Адамово воззвание, и Евино обновление, Мати Света, Пречистая, тьму души моя*

озари, ко свету повелений Господних мя наставляющи.

Песнь 6

Ирмос: *В ките, Христе, тридневновав Иона,/ прописа Тя Безсмертнаго,/ яко мертва волею,/ в сердце земнем тридневновавша.*

Красоту и благолепие во всем возлюбивый, паче же возлюбил еси красоту духовную, и подвигом крестным душу твою преобразил еси, яко сокровенный сердца человек в тебе явися, лепотою Духа Святаго украшенный.

Аще и не млад пришел еси подвизатися, обаче младенчески искал еси заступления, Варсонофие, и обрел еси старцев опытных, скрыв себе от мира в скиту, безмолвием наслаждаяся, да обновлен изыдеши к новому житию.

Горняя мудрствуя присно, истинный мудрец явился еси, возлюбивый Христа, Премудрость Истинную: темже мнози человецы, Бога ищущии, прелестная мудрования тобою оставиша и волю Божию творити научишася.

Богородичен: Оптинский град соблюди, Пречистая, иже созидашеся старцы богомудрыми, и утверди священныя храмы Твоя, Богоблагодатная, да проповедуется миру Слава Божия.

Ин.

Ирмос: *Во глубине греховней содержимь есмь, Спасе,/ и в пучине житейстей обуреваем:/ но якоже Иону от зверя,/ и мене от страстей возведи, и спаси мя.*

Разсуждения и прозрения дар от Бога прием, души бо, яко книги отверстыя, зриши, тайная и неведомая тамо чтеши, и мрежею Духа человеки ловя, из глубины греховныя тех изымаеши.

Старчества и ученичества образ истинный явиша Варсонофий и Никон, отцы преподобнии: ов убо верою и послушанием ко авве взираше, ов же молитвою и любовью чадо свое обымаше. Молите о нас, избранная двоице, от страстей возвести и спасти ны.

Отче Варсонофие богомудре! Иноческое житие азбуце уподобил еси, глаголя: буква аз есть себе

самого познание; буки, на Бога несумненное упование; веди, духовнаго ведения начало; глагол, от избытка сердца устен глаголы; тако бо восходяще от силы в силу, благодатию Христовою назидаемся и спасаемся.

Богородичен: Неизреченно, Чистая Дево, заченшая, и Спаса миру родившая, Того моли и мене от страстей возвести, и спасти мя.

Кондак, глас 4:

Подобен: Явился еси:

Явился еси старчества благочестиваго столп огненный,/ любве Евангельския сияние,/ пророчествуя, назидая и утешая,/ подая человеком от грехов врачевание,/ преподобне Варсонофие, отче наш.

Икос:

Возвестите нам Ангели Божии, тишину молитв скита Оптинского хранящие: киих въздыханий старческих слышатели бысте; колико исцелений и благодарных слез страждущих видесте; жития бо и подвига преподобных отец бысте свидетели, от нихже

единого ныне с вами убажжающе, сице рцем: радуйся, любве Евангельския сияние, преподобне Варсонофие, отче наш.

Песнь 7

Ирмос: Спасый во огни авраамския Твоя отроки,/ и халдеи убив,/ яже правда праведно уловляше,/ препетый, Господи,/ Боже отец наших, благословен еси.

В восточныя страны течение совершил еси Варсонофие, и светносных словес твоих тамо возсияша лучи, воины же, Тайнам Христовым причастнии, благодарне зываху: Боже отец наших, благословен еси.

Еже иноческия уставы древних отцев соблюдая, монашескаго жития зыскующым наставник был еси, обаче и архиереи к тебе притекаху, богомудре, и тобою наставляеми, зываху: Боже отец наших, благословен еси.

Не на силу свою уповал еси, отче, аще и искусен воин быв, обаче ведый коварство вражие, яко отроцы во огни к Богу зывал еси: ныне помози нам, Спасе,

разори халдейское нечестие, Боже отец наших, благословен еси.

Богородичен: Цевнице Давидова, с нами воспой Богоневестную дочь Израильскую, и языки пригласи воспети Той: Еммануилева Мати, благословенна еси, яко откры Господь Правду Свою.

Ин.

Ирмос: *Херувимы подражающе отроцы,/ пеци ликовствоваху вопиюще:/ благословен еси, Боже,/ яко истиною и судом навел еси сия вся, грех ради наших,/ препетый и препрославленный во вся веки.*

Отеческим путем молитвы шествовати хотящих, укреплял еси, преподобне, ко скорбем и напастем душу свою уготовати, во искушениях же верою взывати: благословен еси, Боже, яко истиною и судом навел еси сия вся, грех ради наших, препетый и препрославленный во вся веки.

Фарисейское велеречие отринув, мытарски по вся дни взывал еси, отче: Боже, очисти мя, Иисусе, помилуй мя, препетый и препрославленный во вся веки.

Истину учения Церкви исповедуя, адския муки во откровении чувством сердца постигл еси, но, отчаяние препобеждая, взываше: благословен еси, Боже, препетый и препрославленный во вся веки.

Богородичен: Яко росоносная пещь халдейская, огонь Божества неопально во чреве приемшая, Богородице Дево, пламень страстей моих ороси, да Тя пою во вся веки.

Песнь 8

Ирмос: Руце распростер Даниил, / львов зияния в рове затче: / огненную же силу угасиша, / добродетелию препоясавшися, / благочестия рачители отроцы взывающе: / благословите, вся дела Господня Господа.

Евангельски душу твою за овцы положить хотя, на крест послушания возшел еси, доблемудре Варсонофие, образ яве в себе предначертав, пастыря и агнца, Христу Пастыреначальнику подобяся.

Мира великое смятение предрекл еси, о гонении Церкви Божия яве предуказав, и предания иноческая призывал еси хранити, вражию бо силу победит сила

Божия, темже наставляя еси, Варсонофие: благословите, вся дела Господня Господа.

Утверждая на стезях спасительных верныя, иже притекаху к тебе, Варсонофие отче, скорби претерпел еси от лжебратии, обаче добродетелию препоясався, смиренно взывал еси: благословите, вся дела Господня Господа.

Богородичен: Высока, Богородице, тайна, яко из утробы Твоея Солнце явися в мир незаходимое, и лучи девства непостижимаго осияша человеческое естество, темже, благочестия рачители, благословите, Деву и Матерь Господа.

Ин.

Ирмос: *Неизреченною мудростию/ составльшаго всяческая Бога Слова,/ и от не сущих во еже быти Приведшаго,/ благословите, дела, яко Господа,/ и превозносите во вся веки.*

Утреннюющу ти к Богу на всяку ночь, источник сладости и утешения во службе церковней тебе отверзся, от негоже почерпая, Варсонофие, отче

наш, наставляеши чада твоя, Господа пети и превозносиши Его во вся веки.

Благодатных исцелений и прозрений дар смиренномудренно сокрывая, в таинствах Церкви путь врачевания указуеши, и ко источнику преподобного Тихона недужных посылаеши, яко да приемшии по вере своей врачевство, единого Господа поют и превозносят во вся веки.

Любезных ти старцев Оптинских возлюбленный сомолитвенниче, и благодатного пастыря Кронштадтскаго духовный сотаинниче, купно с ними исцеления подаеши притекающим с верою, да вси дивнаго во святых своих Бога поют и превозносят во вся веки.

Богородичен: Ад упразднися и рай паки отверзесе, Твоим Рождеством, Дево, темже Тя, яко Матерь Избавителя, поем и превозносим во вся веки.

Песнь 9

Ирмос: *Бог Господь и явися нам,/ составите праздник/ и веселящесе,/ приидите возвеличим*

*Христа,/ с вайами и ветвѣми, песньми зовуще:/
Благословен грядый во имя Господа Спаса нашего.*

Яко злато искушено во огни скорбей, чист явился еси Владыце твоему, Варсонофие, и яко камень многоценный, огранен рукою искусною, в диадиме Оптинстей укреплен, ныне сияеши в пренебесней сокровищнице Господа Спаса нашего.

Звезда еси, отче, Оптинская, путеводящая в горний Иерусалим: аще и тьма накроет нас в стране далече, но на тебе взирающе, паки поспешим ко Отцу, да во время свое веселящися внидем в дом Господа Спаса нашего.

Еже от Христа приял еси дарование, преподобне, знаменія творити и чудеса, яко глухому и немому отроку слух и уста отверзл еси: темже и души наша исцели, к целомудрию приводя память твою чтущих и величающих Господа Спаса нашего.

Богородичен: Младенца Божественнаго рождши, во объятіях Того носила еси, и от сосцу питала еси, Богородице, со ангелы у яслей воспевающіи: слава в

вышних Богу, возвеличившему Деву, яко Матерь Господа Спаса нашего.

Ин.

Ирмос: *От Бога Бога Слова,/ неизреченною мудростию пришедшаго обновити Адама,/ ядию в тление падшаго люте:/ от Святыя Девы неизреченно воплотившагося нас ради,/ вернии, единомудренно песньми величаем.*

Жестоковыйныя, яко козлища, от овец Христовых отделил еси, пастырю добрый, обитель Оптину от духа мира сего молитвенно ограждая.

Аще и клеветы и гонения сыны века сего воздвигоша на тя, и от обители Оптины отлучиша, обаче духом не разлучился еси возлюбленных братий, по преставлении к сим телом возвратився, тии же тя, яко жива, со слезами сретоша, единомудренно Бога величающе.

Единаго Агнца и Пастыря кроткий служителю, яко агнец безгласен, скорби терпя, иноком Голутвинским пастырь добрый явился еси, в попечении о душах

даже до смерти труждаяся, темже тя любовью, старче Варсонофие, уболажаем.

Богородичен: Мати Слова, Сосуде чистоты, безсловесных страстей мя избави, яко да Воплощеннаго от Тебе разумно величаю.

Светилен:

Подобен: Небо звездами:

Небо звездами украсивый, яко Бог, и землю нашу любовью старцев Оптинских озаривый, Содетелю всех, поющия Тя спасай.

Слава:

Победоносно светоносый светильник разсуждения, озарил еси иноком путь спасительный, настави и нас грешных, отче Варсонофие, да чада света наречемся.

И ныне, Богородичен:

Сладосте ангелов, скорбящих радости, христиан предстательнице, Дево, Мати Господня, заступи нас, и избави вечных мук.

На хвалитех стихиры преподобнаго, глас 4.

Подобен: Дал еси знамение:

Дал еси украшение / Церкви Русской, Господи, /
преподобнаго Варсонофия, / Твоего угодника, / в
соборе старцев Оптиных светло сияюща, / и путь
спасения верным озаряюща, / того молитвами грехов
наших тьму отжени, / Иисусе всесильне, / Спасе душ
наших.

Дал еси знамение / отечеству нашему, Господи, /
пророческая словеса Варсонофия Оптинскаго, / яко
паки возстанут гонители на Церковь Твою, / и паки
кровь христианская пролиется, / обаче претерпевшия
до конца спасени будут. / Сих же сбытие видевше,
славим премудрость Твою, / Иисусе всесильне, / Спасе
душ наших.

Дал еси хваление / Оптиной обители, Господи, /
честныя и цельбоносныя мощи / преподобнаго
Варсонофия, Твоего угодника, / ихже ныне радостно
лобызаем, / исцеления различная приемлюще, / темже
Твое неизреченное милосердие славим, / Иисусе
всесильне, / Спасе душ наших.

Слава, глас 6:

Все отложив житейское томление,/ и сладость
мирскую презрев,/ крест возьму, яко иго
Божественное,/ и Христу последую в житии
иночестем,/ к небесному покою чудно вселился еси./
О, друже Христов, сосуде Духа Святаго честный,/
преподобне старче Варсонофие,/ прииди и стани
посреде нас невидимо,/ сподобляя даров
невещественных/ твой праздник совершающих
святолепно.

И ныне, Богородичен, глас тойже:

Бога из Тебе воплотившагося разумехом,/
Богородице Дево:/ Того моли о спасении душ наших.

На Литургии

Блаженны от канона преподобнаго, песнь 3-я и 6-
я. Прокимен, глас 7: Честна пред Господем/ смерть
преподобных Его. Стих: Что воздам Господеви о всех,
яже воздаде ми? Апостол к Галатам, зачало 213.
Аллилуиа, глас 6: Блажен муж, бояйся Господа,/ в
заповедех Его восхощет зело. Стих: Сильно на земли

будет семя его. Евангелие от Матфея, зачало 10.
Причастен: В память вечную будет праведник, от
слуха зла не убоится.

**[Священный Синод на заседании 16-17 июля
2020 года (журнал № 34) утвердил к
общецерковному богослужебному употреблению
текст службы преподобному Варсонофию
Оптинскому]**

